

O'ZBEKISTON RESPUBLIKASI
ADLIYA VAZIRLIGIDA
DAVLAT RO'YXATIDAN O'TKAZILDI
RO'YXAT RAQAMI: 3058
20/18 yil 20 August



**ЎЗБЕКИСТОН RESPUBLIKASI XALQ TA'LIMI VAZIRLIGI
ЎЗБЕКИСТОН RESPUBLIKASI BANDLIK VA MEHNAT
MUHOSABATLARI VAZIRLIGINING
QARORI**

**Умумий ўрта таълим муассасаларининг педагогик мутахассисликлари бўйича
намунавий йиллик иш режасини шакллантириш тартиби тўғрисидаги
йўриқномани тасдиқлаш ҳақида**

Ўзбекистон Республикаси Вазирлар Маҳкамасининг 2005 йил 21 декабрдаги 275-сон “Халқ таълими ходимлари меҳнатига ҳақ тўлашнинг такомиллаштирилган тизимини тасдиқлаш тўғрисида”ги қарорига мувофиқ Ўзбекистон Республикаси Халқ таълими вазирлиги ҳамда Бандлик ва меҳнат муносабатлари вазирлиги қарор қилади:

1. Умумий ўрта таълим муассасаларининг педагогик мутахассисликлари бўйича намунавий йиллик иш режасини шакллантириш тартиби тўғрисидаги йўриқнома иловага мувофиқ тасдиқлансин.

2. Мазкур қарор расмий эълон қилинган кундан эътиборан кучга киради.

Халқ таълими вазири

Ш. Шерматов

Тошкент ш.,
2018 йил 27 июль,
9-мх-сон

Бандлик ва меҳнат
муносабатлари вазири

Ш. Кудбиев

Тошкент ш.,
2018 йил 27 июль,
19-мх-сон

Ўзбекистон Республикаси
Халқ таълими вазирлиги ҳамда Бандлик
ва меҳнат муносабатлари вазирлигининг
2018 йил 27 июл даги
9-МХ ва 19-ҚА сон қарорига
ИЛОВА

**Умумий ўрта таълим муассасаларининг педагогик мутахассисликлари бўйича
намунавий йиллик иш режасини шакллантириш тартиби тўғрисидаги
ЙЎРИҚНОМА**

Мазкур Йўриқнома Ўзбекистон Республикаси Вазирлар Маҳкамасининг 2005 йил 21 декабрдаги 275-сон “Халқ таълими ходимлари меҳнатига ҳақ тўлашнинг такомиллаштирилган тизимини тасдиқлаш тўғрисида”ги қарорига мувофиқ умумий ўрта таълим муассасаларининг педагогик мутахассисликлари бўйича намунавий йиллик иш режасини (бундан буён матнда иш режа деб юритилади) шакллантириш тартибини белгилайди.

1-боб. Умумий қоидалар

1. Иш режа умумий ўрта таълим муассасаси педагог ходимининг йиллик иш юкламасидан (тарификация бўйича ажратилган дарс соатларидан) иборат.

2. Педагог ходимлар учун дарс соатларининг тарификацияси умумий йиллик иш юкламасида белгиланган 1548 соат (йиллик 43 ҳафта, ҳафталик 36 соат, кунлик 6 соат) ҳисобидан амалга оширилади.

3. Умумий ўрта таълим муассасасининг педагог ходимлари учун бир ставка миқдоридagi иш юкламаси қуйидагича белгиланади:

1-4-синфларда ҳафтасига 18 соат;

5-11-синфларда ҳафтасига 20 соат.

**2-боб. Умумий ўрта таълим муассасалари педагог ходимларининг иш юкламаларини
ҳисоблаб чиқариш**

4. Иш режани шакллантириш учун умумий ўрта таълим муассасаси педагог ходимининг йиллик иш юкламаси ҳисоблаб чиқарилади.

Умумий ўрта таълим муассасаси педагог ходимининг йиллик иш юкламаси қуйидагича ҳисоблаб чиқилади:


1-4-синфлар учун белгиланган бир ставка миқдоридagi иш юкламаси ҳафталик ҳажмини 1 коэффициентга кўпайтириш орқали, яъни:

$18 \cdot 1 = 18 + 18 = 36 \cdot 4,3 (\text{ҳафта}) = 154,8 \cdot 43 (\text{ҳафта}) = 1548$ соат;

5-11-синфлар учун белгиланган бир ставка миқдоридagi иш юкламаси ҳафталик ҳажмини 0,8 коэффициентга кўпайтириш орқали, яъни:

$20 \cdot 0,8 = 16 + 20 = 36 \cdot 4,3 (\text{ҳафта}) = 154,8 \cdot 43 (\text{ҳафта}) = 1548$ соат.

5. Умумий ўрта таълим муассасаси педагог ходимининг йиллик иш юкламаси (бир ставка ҳисобида) бир ҳафтада 36 соат, бир ойда 154,8 соат, бир йилда 1548 соат



миқдорида қуйидаги қисмлардан иборат ҳолда амалга оширилади:

ўқув-тарбия жараёни;

ўқув-тарбия жараёнининг методик таъминоти ва ташкилий-педагогик жараён.

6. Ўқув-тарбия жараёни учун ажратиладиган соатлар миқдори қуйидагича аниқланади:

1-4-синфлар учун белгиланган бир ставка миқдоридаги иш юкламаси ҳафталик ҳажмини бир йил мобайнида дарс машғулоти олиб бориладиган ҳафталар сонига кўпайтириш орқали, яъни $18 \cdot 34 = 612$ соат;

5-11-синфлар учун белгиланган бир ставка миқдоридаги иш юкламаси ҳафталик ҳажмини бир йил мобайнида дарс машғулоти олиб бориладиган ҳафталар сонига кўпайтириш орқали, яъни $20 \cdot 34 = 680$ соат.

7. Ўқув-тарбия жараёнининг методик таъминоти ва ташкилий-педагогик жараён учун ажратиладиган соатлар миқдори қуйидагича аниқланади:

1-4-синфлар учун белгиланган бир ставка миқдоридаги иш юкламаси йиллик ҳажмидан ўқув-тарбия жараёни учун ажратиладиган соатларни айириш орқали, яъни $1548 - 612 = 936$ соат;

5-11-синфлар учун белгиланган бир ставка миқдоридаги иш юкламаси йиллик ҳажмидан ўқув-тарбия жараёни учун ажратиладиган соатларни айириш орқали, яъни $1548 - 680 = 868$ соат.

3-боб. Умумий ўрта таълим муассасаларининг педагогик мутахассисликлари бўйича намунавий йиллик иш режасини шакллантириш

8. Иш режа икки йўналишдаги тадбирлар мажмуасидан иборат тарзда шакллантирилади:

ўқув-тарбия жараёнига оид;

ўқув-тарбия жараёнининг методик таъминоти ва ташкилий-педагогик жараёнга оид.

9. Ўқув-тарбия жараёнига оид йиллик иш режа умумий ўрта таълим муассасаси раҳбарияти томонидан тасдиқланган дарс жадвалига кўра педагог ходимларга тарификация бўйича ажратилган дарс соатлари асосида шакллантирилади.

10. Ўқув-тарбия жараёнига оид йиллик иш режа асосида педагог ходим томонидан ўқув йили бошланишидан олдин тақвим-мавзуй режа тузилади. Дарс машғулоти тақвим-мавзуй режага асосан олиб борилади.

11. Ўқув-тарбия жараёнига оид йиллик иш режанинг ўз вақтида ва сифатли бажарилиши устидан умумий ўрта таълим муассасаси директори ва унинг ўқув-тарбия ишлари бўйича ўринбосари назоратни амалга оширади.

12. Ўқув-тарбия жараёнининг методик таъминоти ва ташкилий-педагогик жараён умумий ўрта таълим муассасаси олдида қўйилган вазифалардан келиб чиққан ҳолда, таълим сифатини ошириш, ўқувчиларнинг билимларини мустаҳкамлаш, маънавиятини юксалтириш, бўш вақтларини мазмунли ташкил этиш билан боғлиқ дарс машғулоти ташқари тадбирларни ўз ичига олади ва ушбу тадбирлар муассасанинг ҳар йиллик ҳамда истикбол режасида кўзда тутилади.

13. Ўқув-тарбия жараёнининг методик таъминоти ва ташкилий-педагогик жараёнга

оид йиллик иш режада ҳар бир педагог ходимнинг лавозим мажбуриятлари ҳамда у билан тузилган меҳнат шартномасида белгиланган вазифалар билан бир қаторда ўқувчиларни баркамол ва маънавий етук инсон этиб тарбиялаш мақсадида уларнинг қобилият ва истеъдодларини ривожлантиришни назарда тутган ҳолда, фанларни ўзлаштиришда қийналаётган ва иқтидорли ўқувчилар билан алоҳида машғулотлар олиб бориши ҳамда педагог ходимнинг ўз устида мустақил ишлаши назарда тутилади.

14. Ўқув-тарбия жараёнининг методик таъминоти ва ташкилий-педагогик жараёнга оид йиллик иш режада белгиланган тадбирларнинг амалга оширилиши юзасидан педагог ходимлардан ҳисобот талаб қилинмайди ҳамда тадбирларни амалга оширишнинг вақт бўйича ҳисоби юритилмайди.

15. Умумий ўрта таълим мактаби ўқитувчиларининг дарс ва тўғарак машғулотларини ташкил этиш ҳамда синф журналин юритишдан ташқари бошқа педагогик юкламалар бўйича ҳисоботлар ва қўшимча маълумотларни талаб қилиш қатъиян тақиқланади.

Умумий ўрта таълим муассасалари педагог ходимлари томонидан қуйидаги ҳужжатлар юритилади:

синф журнали;

йиллик таквим-мавзуй режа.

кундалик дарс ишланмалари (конспект) дафтари.

16. Йиллик таквим-мавзуй режа ҳамда кундалик дарс ишланмалари (конспект)ни электрон шаклда юритилишига ҳам йўл қўйилади.

4-боб. Яқуний қондалар

17. Ўриндошлик ва соатбай асосида дарс бераётган, ишда вақтинча бўлмаган ходимнинг меҳнат вазифаларини ўзининг асосий иши билан биргаликда қўшимча равишда бажараётган педагог ходимларга ўқув-тарбия жараёни билан биргаликда унга мос коэффициентдаги ўқув-тарбия жараёнининг методик таъминоти ва ташкилий-педагогик жараён учун ажратилган соатларга ҳам ҳақ тўланади.

18. Мазкур йўриқнома талаблари бузилишида айбдор бўлган шахслар қонун ҳужжатларида белгиланган тартибда жавобгар бўлади.